

## DIS DA LITTERATURA

# Mali Mali

DA RUT BERNARDI

Igl era ina gievgia, ils 21 da december, cura che jau hai stuì consentir da la far davent. Igl era il medem avantmezdi da la mort vulida da quel um schirà dal chau enfin al pe, che giascheva gia dapi passa diesch onns en letg, attatgà a maschinas. Ditg aveva el stuì batlegiar per sia mort e las gasettas da l'entira Europa scrivevan dad in assassinat intenziunà.

Ed a mai, en mes pitschen mund, aveva gist quest avantmezdi la veterinaria ditg: «Vus stuais esser d'accord, uschiglio na poss jau betg far quai!»

Mali Mali era ina bella damaun tuttenina en mes iert, ella era sa tschentada sut l'apricoser tibetan. La primavaira sa preparava, ed ella giudeva l'emprim chaud dal sulegl.

Cura ch'ella m'aveva vesì, aveva ella vulì fugir, ma jau aveva emprendì dad avoir pazienza cun ils animals, quai vul dir spetgar. Ils temps dals animals en auters che ils noss, ins als sto laschar temp da valitar la situaziun e d'ans studegiar. Els ston daventar conscients cun tgi ch'els han da far.

Pelvaira, l'emprim mument era jau starmentada; in giat uschè magher e sburritschì n'aveva jau anc mai vesì. Ella starnidava e tussiva trasora; dal nas culava la mutschigna e ses eglis eran taggads dad ina crusta setgada. Ma il pli ma deva da far sia egliada penetranta ch'ella ma bittava. Mes emprim patratg era: il diavel (l malan). Uschia aveva ella la finala survegni senza culpa il num Mali Mali. Ella che era quasi dal tut alva. Pitschens tachels brin clers aveva ella be enturn l'ureglia sanestra e giudim il dies ed era la mesadad da la cua era brina.

Dis a la lunga l'hai jau be guardà ed hai discurrì cun vusch bassa cun ella. Jau m'avischinava plaunsieu ad ella cun insatge da magliar e mintga di vegniva er ella in zic pli datiers. Uschia era ella in di

tuttenina davant l'isch e na tschessava betg pli dal lieu.

Plaun a plaun era ella daventada uschè curaschusa ch'ella chatschava davent ils auters giats che gughegiavan da vegnir en la vischinanza. Mes agens giats stevan be pli davos chasa. Mali ma spetgava l'entir di e quai betg be pervi da la maglia, ma era per sa stritgar enturn mias chommas. In pau a la giada è ella er sa laschada tutgar cun ils mauns ed jau empruvava da lavar ora ses eglis e da schubregiar ses nas cun in sdratsch ed aua chauda. Questa procedura laschava ella la finala far senza sa mover, sche jau la tegneva cun in maun per la pel dal culez, là, nua che la giatta porta ses pitschens, uschia che jau pudeva schubregiar il nas ed ils eglis cun l'auter maun.

Ma igl era sco striunà, ella na sa revegniva gnanc per in zic. Jau sperava che la stad, il chaud e la buna maglia la gidassan a guarir. Ma ella buffava e ragagnava vinavant e sa stentava adina dapli da trair il flad. E lura anc las attatgas ch'ella aveva mintgatant. Nunspegtadamain sa bittava ella sin mias chommas e ma sgriflava cun sias pitschnas griflas – franc senza nauscha intenziun. Lura era tuttenina tut puspè passà. Jau n'hai mai savì tge che effectuava quests culps, sch'ella aveva mal u tge dianter che l'aveva chatschà.

Tar Mali Mali n'era sa midà nagut enfin l'atun tard. Entant aveva jau mess in chanaster cun ina cuverta loma per ella en suler, per ch'ella na pateschia betg il fraid dator. Be pli ina mesa ura al di gieva ella ora. Ma in di, curt avant Nadal, èsi capità. Mali na sa muveva betg pli. Ella giascheva en ses chanaster e na sortiva gnanca per baiver ses latg. Di per di derasava ella in tuffien pli ferm che piztgava en il nas. Natiralmain che jau aveva remors da conscienza. Gia daditg avess jau stuì ir tar la veterinaria cun ella, ma jau aveva adina sperà ch'ella sa revegnia.

La media ha l'emprim manegià che Mali saja ina giatta ordvart brava e du-

mestia, cunquai ch'ella n'era betg siglida or dal chanaster avert. La diagnosa ha mussà in catar cronic ed jau dueva tractar ella per insaquants dis cun squittas d'antibiotica. Da dar medischina tras la bucca na gieva betg, ella sa dustava cun tuttas quatter toppas.

Durant quels quatter dis a chasa la deva jau mintga di la squitta e jau aveva l'impressiun da vesair in pitschen meglierament. In di è ella schizunt sortida da ses chanaster ed ha bavì in pau latg, ma be ina largezza dal det. Danovamain tar la media n'ha quella l'emprim ditg nagut, ella ha be guardà Mali ditg a la lunga, ed è lura sa drizzada a mai:

«Jau hai ina supposiziun, ma per quai stuess jau prender sang, sche Vus essas d'accord!»

I n'era betg simpel da chattar in'avaina en la fina toppa che jau aveva da tegnair. Insaquantas giadas era Mali siglida si ed ans aveva sgriflà, ma cura che la gugia steva, è'la sa calmada. Per l'analisi era la media ida davostier.

«Sco nus savevan gia, aveva Mali ina puntga acuta sin omaidava alas dal lom, ma lura ha ella anc leuchemia ed ultra da quai è ella anc malsauna dad aids!»

«Tge? Dad aids? Jau na saveva gnanc che animals possian daventar malsauns dad aids.»

«Ah, ma quai è bain derasà tranter ils giats. Ma i n'è nagin che sa. Ma n'hajas nagina tema, i n'è betg transmissibel sin nus umans. Be ils auters giats enturn chasa pudessan esser infectads, sch'els avevan contact cun ella.»

«E tge faschain nus uss cun Mali?»

«Eventualmain – sch'ins guarda bain dad ella e la tegn a chaud, lura pudessan ins rabagliar tras ella anc per dus onns.»

«Ma ella n'è gnanca mes giat.»

«Jau schess era ch'i n'haja nagin senn da trair vinavant.»

«Vulais Vus dir che Vus la faschessias davent?»

«Quai na poss jau betg decider. Vus stuais dir, sche jau la duai durmentar.»

«Jau?»

«Igl è franc il meglier per Mali. Ella na vegn a sentir nagut. Jau la dun l'emprim ina narcosa e pir lura la squitta che ferma il battacor. Pudais Vus la tegnair per plaschair?»

«Jau na sai betg. Gia prender il sang na m'ha betg fatg bain.»

«Perstgisai, ma savais, jau na patratg savens betg londervi. Jau hai bain remartgà avant che Vus avevas larmas en ils eglis. Forsa èsi meglier, sche Vus spetgais diesch minutas dadora.»

En sala da spetga sesevan in um cun ses chaun ed ina mattetta cun in cunigl en in chaset. Jau empruvava da patratgar vi d'insatge auter. Vi da la paraid taggava in placat da razzas da chauns. Il meglier fissi stà, sche jau avess discurrì cun insatgi. Ma jau n'era betg pli buna da retegnair mias larmas. Dadens sin la maisa fraida muriva gist Mali.

Cura che jau sun vegnida clamada da la media, giascheva Mali sin in lenziel verd d'ospital. Ella era uschè bella. Jau veseva co ch'i gieva uss bain cun ella. Ditg curt, ella na pativa betg pli!

Sche jau la possia sepulir insanua, m'ha la media dumandà. Forsa insanua en il gaud. Era sch'i saja scumandà, ella fetschia era quai mintgatant, cura ch'ella na sappia betg nua metter in animal mort. Jau na saveva betg, sche jau fiss stada buna da chavar si la terra schelada da december. Nus ans essan unidas che la veterinaria portia Mali en il crematori d'animals. Ils pèr dis fin là vegnia ella conservada en la schelentera.

Sco gia menziunà era Mali morta il medem avantmezdi sco quel um schirà che era en tuttas gasettas. Il medi che aveva interrut ils apparats per survivor era vegnì accusà. La chaussa n'ha anc betg chattà ina sentenza. Era jau bragel anc mintgatant in zic per Mali e la dumond per perdun.